


Sang President Thomas S. Monson



Kitail Onopadahr?

Nan wasa me ehu pako I kousoan oh papah ie, Mwomwohdiso katanga ehu wasahn malek oh kutohr me tohn ward kan en wasao kin wie doadoahk ni sohte pweipwei. Pali laud en ansou doadoahko inenen pweida mwahu oh kin wahlahng nan wasahn nekinek en pisop kan kid en kutohr oh paun pohnangin epwiki en malek me lekdier oh kamwakeldahr. Ahpw ekei ansou, pwehki arail sohte nohn mai en wia soun mwetwel oh sohte kin alepweipwei, kaidehn pehrail te me kin topwala ahpw re pil kin mwoarosala.

Karasepe, I sohte kak manokehla ehu pako se kihpene irail mwahnakapw pwulopwul en Aaronic Priesthood kan pwe ren kamwakelehda wasao. Aht pwihn ngoang oh keh-lailo pokonpene wasao oh sohte pward usada, kesepene oh isikada kidelepen dihpw oh kihd. Sang ni marain me kohsang kisiniei lulul, se tungoale 'hot dog' oh pein kepingahla pein kiht pwehki doadoahk mwahu me se wiadahro.

Ahpw, mie lapalahn kahpwal ehu. Ngihl kan oh kisiniei kan kataironge oh lidere litok 5,000 kahrehiong winerail mwerasang oh irail sohla kutohr. Mwuri se mendahkihla kisin dihpw kan pwe litok kan en kak kutkutohr.

Sohte tohn Mwomwohdiso me sewese irail akan me pato nan kahpwal kak manokehla de koluhkihla irairo. Doadoahk pwerisek, pwain ni kasohtik, uhtohr, oh kiskise mehteikan sohte wia mehkot kapw ong kitail.

Kitail anahne tamataman me wiepen nekinek me keieu mwahu iei ehuehu peneinei nan Mwomwohdiso en nekinekid kisin mwenge, likou, oh, ma kak, soangen anahn

teikan ong momour. Sapwellimen Kauno wasahn nekinek iangahki ansou, koahiek kapai kan, semen en doadoahk kan, limpoak, dipwisou kan me kasarawiala, oh mwohni kan en tohn Mwomwohdiso loaloapwoat kan. Mehn sawas pwukat me pisop kak doadoahngki pwehn kin sewesehki irail me anahne.

Se kangoange Souleng en Imwin Rahn Akan koaros en kin pilahn ni keneinei, en kin kasohtik nan arail mour, oh dehr wiahda pweipwand laud de me sohte anahnepe. Aramas tohto pahn kak kalewehdi kahpwal en mwohni kan ma re ahniki nekinek en kisin mwenge oh likou oh sohte arail pweipwand. Rahn wet se diarada me tohto me idawehn kaweid wet ni mwohmw me weksang oh sapwung: re ahniki nekinek en pweipwand ehu oh sohte kenerail kisin mwenge.

I pahn kapwurehiong dahme Presidensi Keieu kalohki-dahr sounpar kei samwalahr:

“Souleng en Imwin Rahn akan alehdier kaweid erein sounpar kei ren kin onopada ong ansou apwal ni arail pahn kin nekidala ekis mwohni. Wia met pahn elehda onepek mwahu oh nsenamwahu. Peneinei koaros ahniki pwukoa en pein apwalih pein arail anahn akan ni uwen arail kak koaros.

“Se kangoange kumwail sohte lipilipil wasa me kumwail kousoan ie nan sampah en onopada ong ansou apwal ni amwail kin tetehek noumwail mwohni kan. Se kangoange kumwail en kin kasohtik ni amwail netinet kan; kin koasoane oh mwasamwasahn mwahu dahme

kumwail kin pwainda pwe kumwail en dehr wiahda pweipwand. Kapwungala pweipwand ni uwen mwadang me kumwail kak, oh kasaledek kumwail sang nan kehnaudek wet. Kin kalapw nekidala ekis mwohni pwehn ekisekis wiahda ehu nekinek en mwohni.”¹

Kitail onopadahr ong emersensi de irair karuwaru kan nan atail mour? Atail semen en doadoahk kan unseklahr? Kitail momourki mwohmw kasohtik? Mie atail nekinek? Kitail kin peikiong kosonned akan en Koht? Kitail kin idawehn kaweid kan sang soukohp akan? Kitail onopadahr kiskisehki me semwehmwe oh me anahn akan atail dipwisou? Kitail pwung rehn Kauno?

Kitail koukouson nan ansou pingiping. Dahme pahn pwarada mwuhr sohte kin kalapw sansal; ihme kahrehda kitail anahne kaunopada ong irair sohte kesikpe me kin pwarada. Ni ansou me ansou koasoanehdi pahnleledohr, ansoun onopada pahn nekier.

IREN SAWAS

1. Presidensi Keieu, *Koaros Nekneklongehr Mwahu: Nein Peneinei Mwohni* (kisin pwuhk, 2007).

PADAPADAHK SANG IREN MAHSEN WET

Nin duwen anahn kan en me komw kin tuhwong, medewe ia mwomwen omw pahn sewese irail en kak uhtohr nan doadoahk, mwohni, nekinek en kisin mwenge, oh onopada ong emersensi de irair karuwaru. Medewe soangen semen en doadoahk dah me komw kak ehukiong irail, me duwehte mwetuwel de apwalih mwohni, pwehn kakehlada irail en kak idawehn en Presiden Monson kaweid.

ME PWULOPWUL KAN

I Pwurehng Papah

Sang Jaïne Araújo

Ehu rahno, mwurin ahi kanekehla ehu doadoahk en papah, I aluhla daulih aht ihmw sarawio ngehi

kilangada sister riemen kamwakamwakele ihmwo. Ahi lokaia pwukat mwadange pweidiei: “Sister kan, kumwa anahne sawas? Emen ira sireido oh nda me I lella ansou mwahu pwe irahte me wie kamwakamwakel oh ira inenen pwangadahr. Liho nda me e kapakap oh peki Kauno en kadarala emen aramas en sewese ira. I perenkihda ahi wia pasapengpen ah kapakapo. I apwtehn kanekehla ahi sewese emen tohrohr oh I pil pwangadahr, ahpw I idawehnla ruwes en mohngiongong oh pwungkihla ien kihda pil ehu sawas.

E wia ehu kosonned kitail en doadoahk ni popohl (tehk D&C 24:7). Ni atail kin inangih papah ansou koaros, kitail kak kahrehda mehkot manaman en kin pweida nan ahn ekei aramas arail mour. E kin miehla katepen atail mour ni atail kin papah. Kauno ni mehleh poakpoake kitail, E kin sewese emenemen Sapwellime serihkan, oh E pahn ketikihong kitail roson pwe kitail en kak papah.

Soun ntingo kin kousoan Rio Grande do Norte, Brazil.

SERIHKAN

Kumwail Onopadahr?

Pasapeng kan: Pwung, Pwung, Sapwung, Pwung, Sapwung

President Monson pekihier emenemen kitail en onopada ong ansou apwal kan oh en sewese mehteikan nan arail ansou apwal kan. Ale sikeng en pwung-de-sapwung wet pwe ken kak kilang ma ke onopadahr!

I kak ansou koaros diar aramas I en sewese.

Pwung Sapwung

I kak kaping kalahnganki mehkoaros me I ahnekihier. Pwung Sapwung

Sohte ahi koahiek kapai me I kak ehukihong emen tohrohr. Pwung Sapwung

Nekidala mwohni ong mwuhr wia madamadau mwahu ehu. Pwung Sapwung

I anahne mehn mwadong oh likou kapw pwe I en kak peren. Pwung Sapwung



Misin Sarawi en Sises Krai: Sounkaloalamwahu

Onopiki audepen padahk wet ni kapakap oh rapahki en ese dah me komwi en ehukihong mehteikan. Ia duwen wehwehki mour oh misin en Sounkomouro eh pahn kalaudehla omw pwoson Ih oh kapaiaada irail akan me komw kin tetehk sang padahk en pas? Pwehn alehdi iren sawas kapatapat, tehk reliefsociety.lds.org.

Pwoson, Peneinei, Sawas

Padahk wet wia kishen Padahk en Pas kei me pahn kohdo mwuri me pid misin en Sounkomouro.

Sises Krai inoukidahr, “I sohte pahn likidmelieikumwailla, ahpw I pahn pwurodo rehmwail” (Sohn 14:18). E pahn ketikihong kitail “peren oh nsenamwahu, ahpw kaidehn pahtou” (Aiseia 61:3). Pwehki Krai ketin lokolongki Tomwo ong emenemen kitail, E sohte pahn likidmelieikitailla. “Pwehki Sounkomouro ketin ketikidahng Pein Ih . . . atail weirek oh atail lokolok oh kahpwal kan pwe En kak mwahngih dahme kitail kehn oh wiepen kansenamwahuih kitail,” patohwenda Linda S. Reeves, soun-sawas keriau nan presidensi lap en Pwihn en Sawas en Lih.¹

Atail eshier me Krai pahn kansenamwahuwih kitail kak elehda meleilei oh kahrehiong kitail en idawehn Sapwellime karasaras en papah mehteikan. President Thomas S. Monson koasoia: “Atail wehwehki rongamwahuo oh atail limpoak ong Samatail Nanleng oh atail

Sounkomouro pahn kansenamwahuih oh kakehlailih kitail oh kahrehiong peren nan atail mohngiong ni atail kin wia me pwung oh kapwaiada kosonned akan. Sohte mehkot nan sampah kak kaleweikitaildi.”²

Sang Pwuhk Sarawi Kan

Sohn 14:18, 23; Alma 7:11–13; Tehk Doctrine and Covenants 101:14–16

Sang Atail Poadoapoad

Elaine L. Jack, ke-ehk riemen en president en Pwihn en Sawas en Lih, patohwan: “Nan pas kan kitail kin nsenohkihda ong emenemen kitail. Pehkan kin kalapw koasoia mehkot me ngihl sohte kak. Ehu pwoaloapwoal mehlel wia mehkot kehlail. Kouruhrpene kin wia mehn kaminimin. Ehu ansoun ehupene kin kaweliakapw loalatail kan. Kitail sohte kak ansou koaros pwekada ahn me pato nan kahpwal ah katoutou kan, ahpw kitail kak pwekada ih pwe en kak wahda mwahu.”³

Lih paionihir kan me wia tohn

Pwihn en Sawas en Lih “diar roson en pali ngehn sang nan ahn mehteikan limpoak oh nsenoh. . . . Ni arail kin diar kahpwal sang soumwahu oh kapelsalehd, irail kin kapakap ni arail pwoson emenemen irail oh kansenamwahuih emenemen irail., ‘Limpoak en Koht kin pwilsang ehu mohngiong ong ehu mohngiong’ ntingihdi Helen Mar Whitney, ‘lao ngehn suwedo luwetala nan ah wie songsong en irepeseng kitail oh Kauno, oh kamedek en nah ketieu kan sohrasang.’”⁴

IREN SAWAS AKAN

1. Linda S. Reeves, “The Lord Has Not Forgotten You,” *Ensign de Liahona*, Nohpembe 2012, 120.
2. Thomas S. Monson, “Be of Good Cheer,” *Ensign de Liahona*, Mei 2009, 92.
3. Elaine L. Jack, nan *Daughters in My Kingdom: The History and Work of Relief Society* (2011), 119.
4. *Daughters in My Kingdom*, 34.

Medewe Met

Ia mwomwen omwi wehwehki me Kauno tamatamn komwi kin kaloalamwahuih komwi?